

四庫全書

史部

欽定四庫全書

史部

文獻通考卷六十九

詳校官內閣學士臣尹壯圖

編修臣程嘉謨覆勘

覆校官中書臣施光輅

校對官庶吉士臣陳墉

謄錄監生臣范鍾

欽定四庫全書

文獻通考卷六十九

鄱陽馬端臨貴與著

郊社考二

郊

成王以周公為有勲勞於天下命魯公世世祀周公以
天子之禮樂是以魯君孟春乘大路載弧韜旂十有二
旒日月之章祀帝於郊配以后稷天子之禮也

大路殷
之祭天

車弧旌旂所以張幅也其衣曰韠天子之旂畫日月

趙伯循曰郊者所以事上帝也魯曷為之周公故也不於日至避王室也卜用夏正於農耕之始也郊特牲疏曰魯之郊祭師說不同崔氏皇氏用王肅之說以魯冬至郊天至建寅之月又郊以祈穀故左傳云啓蟄而郊又云郊祀后稷以祈農事是二郊也若依鄭康成之說則異於此也魯唯一郊不與天子郊天同月轉卜三正故穀梁傳云魯以

十二月下辛卜正月上辛若不從則以正月下辛
卜二月上辛若不從則以二月下辛卜三月上辛
若不從則止故聖證論馬昭引穀梁傳以答王肅
之難是魯一郊則止或用建子之月則宣三年正
月郊牛之口傷是也或用建寅之月則春秋左傳
云郊祀后稷以祈農事是也若杜預不信禮記不
取公羊穀梁魯唯有建寅郊天及龍見而雩

石林葉氏曰明堂位曰魯君孟春祀帝於郊配以

后稷季夏六月以禘禮祀於太廟鄭氏以孟春為
建子之月季夏為建巳之月盖用周正非也郊特
牲曰郊之祭也迎長日之至也又曰郊之用辛也
周之始郊日以至鄭氏謂證易說以三王之郊一
用夏正為建寅之月迎長日為建卯之月晝夜分
分而日長以日至為魯禮亦非也且冬至之日祭
天於地上之圜丘此周之正禮不可得而易者也
孟春建寅之郊盖祈穀之祭爾魯雖得郊不得同

於天子是以故使因周郊之日以次上辛三卜不從至建寅之月而止乃不郊書於春秋者甚明則魯郊殆周祈穀之郊而已故左氏以謂啓蟄而郊安得孟春為建子乎孟春為建寅則所謂季夏六月者建未之月也郊特性以郊為迎長日之至而謂郊之用率周之始郊日以至正以別魯禮而鄭氏反之強以建卯為日至甚矣先儒之好誣也雜記曰孟獻子曰正月至可以有事於上帝七月

日至可以有事於祖七月而禘獻子為之也蓋謂魯不得郊日至故仲孫蔑欲取建未夏至而禘以配周郊祖所以記其失何與六月之禘乎凡周之政事大抵皆用夏正蓋天時有不可亂故周官每以正歲別之易說言三王之郊一用夏正為建寅亦無據鄭氏取以為證徒以成其說爾鄭氏本不曉郊禘之辨故以冬至之祭為大禘以祈穀為正郊此其言所以紛紛雖詩之雍與長發亦豈得其

正也

魯人將有事於上帝必先有事於類宮

先有事於類宮告后稷也魯以

周公之故得郊祀上帝與周同告告者將以配天先仁也類宮郊之學也

春秋僖公三十一年夏四月四卜郊不從乃免牲猶三

望

三望分野之星國中山川皆因郊祀望而祭之魯廢郊天而修其小祀故曰猶猶者可止之辭

左氏曰牛卜日曰牲

既得吉日則牛改名曰牲

牲成而卜郊上怠

慢也望郊之細也不郊亦無望可也

公羊子曰三卜禮也四卜非禮也三卜何以禮四卜

何以非禮求吉之道三曷為或言免牲或言免牛免

牲禮也免牛非禮也免牛何以非禮傷者曰牛

養牲不謹

致有災傷天不饗用不得復為天牲故以本牛易之

三望者何望祭也然則曷

祭祭泰山河海

趙伯循曰公穀云四卜非禮四月不時左氏公穀皆云譏猶三望卜郊不

從而免牲是知不郊故不云不郊

宣公三年春王正月郊牛之口傷改卜牛牛死乃不郊

猶三望

公羊子曰曷為不復卜養牲養二卜帝牲不吉則板

稷牲而卜之帝牲在於滌三月

滌宮名養帝牲三牢之處也謂之滌者取

其蕩滌潔清三牢各主一月取三月一時足以充其天性於稷者惟具是視視其身體

具無災害而已不特養於滌宮所以降稷尊帝

成公七年春王正月鼯鼠食郊牛角改卜牛鼯鼠又食

其角乃免牛夏五月不郊猶三望

十年夏四月五卜郊不從乃不郊

穀梁云五卜強卜也

十七年九月辛丑用郊

公羊子曰九月非所用郊也郊用正月上辛

襄公七年夏四月三卜郊不從乃免牲

左氏孟獻子曰吾乃今而後知有卜筮夫郊祀后稷以祈農事也是故啓蟄而郊郊而後耕今既耕而卜

郊宜其不從也

纂例曰三卜禮也四月不時也

十一年夏四月四卜郊不從乃不郊

定公十五年春王正月鼯鼠食郊牛牛死改卜牛夏五

月辛亥郊

五月不時也趙氏曰子卑年常怪鼯鼠食郊牛致死上元二年因避兵旅於會稽時有水

旱疫癘之苦至明年而牛災有小鼠能噬牛纔傷其皮膚乃無有不死者

哀公元年饕鼠食郊牛角改卜牛夏四月辛巳郊

穀梁子曰此該郊之變而道之也於變之中又有言

焉饕鼠食郊牛角改卜牛志不敬也郊牛日展斛角

而知傷展道盡矣郊自正月至於三月郊之時也夏

四月郊不時五月郊不時也夏之始可以承春以秋

之末承春之始益不可矣九月用郊用者不宜用也

在成十七年郊三卜禮也四卜非禮也僖三十一年襄十一年皆四卜五

卜強也成十年卜免牲者吉則免之不吉則否牛傷

不言傷之者傷自牛作也故其辭緩

宣三年郊牛之口傷以牛自傷

故加之言緩辭

全曰牲傷曰牛未牲曰牛其牛一也其所以

為牛者異

已卜日成牲而傷之曰牛未卜日未成牲之牛

有變而不郊故卜

免牛也已牛矣其尚卜免之何也禮與其亡也寧有

嘗置之上帝矣故卜而後免之不敢專也

嘗置之滌宮名之為

上帝牲矣故不敢擅施也

卜之不吉則如之何不免安置之繫而

待六月上甲始庀牲然後左右之

庀具也待具後牲然後左右前牛在

我用之不復須卜已有新牲故也周禮司門掌授管鍵以啓閉國門祭祀之牛牲繫焉然則未左右時監

門者養之子之所言者牲之變也而曰我一該郊之變而

道之何也我以六月上甲始庀牲十月上甲始繫牲

十一月十二月牲雖有變不道也牲有變則改卜牛以不妨郊事故不

言其變 疏曰上言子者弟子問穀梁子辭而曰我者是弟子述穀梁子自我之意待正月然

後言牲之變此乃所以該郊至郊時然後言其變所必重其妨郊也子

不志三月卜郊何也三月謂十二月正月二月也郊自正月至於

三月郊之時也有變乃志常事不書我以十二月下辛卜正月

上辛如不從則以正月下辛卜二月上辛如不從則

以二月下辛卜三月上辛如不從則不郊矣

意欲郊而卜不

吉故曰不從郊必用上辛者取其新潔莫先也四月則不時矣

孔子曰我觀周道幽厲傷之吾舍魯何適矣魯之郊禘非禮也周公其衰矣杞之郊也禹也宋之郊也契也是

天子之事守也

先祖法度子孫所當守

橫渠張氏曰杞宋之郊則為其二王之後也魯用

天子之禮樂必是成王之意不敢臣周公即以二

王之後待魯然而非周公本意也以成王尊德樂

道之心則善矣伯禽不當受故曰魯之郊禘非禮也周公其哀者謂周公必不饗其祀

三山林氏曰春秋郊望之旨三傳諸儒之說無得之者無他知求小禮而昧於大禮故也經書郊者九皆為有故而書非因卜不吉而廢郊則因牲死傷而廢郊又有不待卜之吉而特郊者雖牛之死傷而必郊者因卜不吉而廢郊則若僖三十一年夏四月成十年夏四月襄公七年夏四月十一年

夏四月是也因牲死傷而廢郊者則若宣三年正月成七年正月是也有不待卜之吉而特郊者則若成十七年九月辛丑用郊是也有牛雖死傷而必郊者則若定十五年正月哀元年春正月是也先儒之說不過罪其屢卜與其養牲不謹爾不知聖人書郊乃惡其非禮之大者至屢卜之瀆養牲之慢非春秋所責也學者欲究聖人之旨先當斷魯郊之當否未暇及其瑣瑣也夫子傷周之衰禮

樂自諸侯出其言魯之郊禘則有周公其哀之歎
豈有天子郊天諸侯亦郊天子望祀山川諸侯亦
望天子禘祖之所出諸侯亦禘使諸侯亦可行則
聖人不以禮樂自諸侯出為傷自夫子沒漢儒不
知道者但見春秋書魯祭祀多天子之禮始妄設
周賜禮樂之說所以諸儒不以魯郊為非捨其非
禮之大者求其不合禮之小者魯人既僭竊禮樂
罪莫重焉就使無四卜五卜瀆禮之過則可以郊

乎否乎又使養牲必謹不至死傷則亦可郊乎否
乎魯人郊望無時可也何區區者之足論然周郊
以冬至而魯用之於啓蟄天子四望而魯三之名
為後時降殺但竊郊望之名已有罪矣譬如商賈
冠師儒之冠庶人服卿相之服望其容飾已知其
非分越制也予謂春秋所書之旨正以有故而不
郊者為幸無故而郊者為大罪也季氏旅於泰山
夫子曰曾謂泰山不如林放乎泰山有知必不享

季氏之祭刳上帝而可謫乎宜乎至於三卜四卜
五卜不從魑鼠屢食其牛可見天心之不享也魯
人曾不知得罪於天雖屢卜不從而猶三望雖牛
死而改卜牛甚者至於用郊可知僭擬之心不能
自己下破王制上拂天心其罪為大也聖人發憤
作春秋書其因變故而不郊者僅如此其餘非卜
不從牛死傷而肆意於僭者又不知其幾也深味
聖師之旨曰猶三望曰乃免牲其深矣乎其微矣

乎學者思之

蔣氏曰魯不得用天子禮樂是成王過賜而伯禽受之非也夫以伯禽受之為非而成王之時禮典未壞不應有是過賜之事識者又從而為之說曰賜非成王是周之末王賜之也昔者魯惠公使宰請郊廟之禮於天子天子使史角往止之使成王之世而魯已郊則惠公奚請惠公之請殆由平王以下也是說然矣自今言之聖人觀周道而傷幽

厲論郊禘而哀周公則重祭賜魯豈盛時賢君事
其出於哀世天子諸侯無疑也故聖人恥魯之事
而因及杞宋之郊杞之郊也存禹後也宋之郊也
存商後也是宜以禹契而配天周祀未絕魯以周
公配天於周公能無愧於后稷太王王季文王乎
是周公之所弗居故曰祝嘏莫敢易其常告是謂
大假假亦大也祭之始也祝以主人之辭而告神
祭之終也嘏以神之辭而致福於主今以諸侯僭

天子之祭事不因其常告則忠孝報反之義名稱位號之別將有所紊亂變更而失其宜矣

按先儒論魯郊祀之非如林少穎謂三傳所譏捨其非禮之大者求其不合禮之小者其論正矣然遂以為非出於成王之命特漢儒見春秋所書魯祭祀多僭天子之禮始妄設周賜禮樂之說至蔣氏遂直以為出於惠公之請則愚未敢以為然蓋春秋之際雖諸侯不無上僭然苟非如楚及吳越

之流介處蠻貊自放於禮義之外者則亦不敢奄
然以天子之制自居雖以五伯盛時晉侯之請隧
楚子之問鼎如襄王及王孫滿尚能引正義以責
之不聞晉楚之君遽至於用隧而求鼎也僭郊之
事大於請隧問鼎矣惠公當平王之時王室雖弱
其陵夷不至於後來之甚魯又素為秉周禮之國
夫子嘗稱其一變可以至道孰謂惠公於是時而
敢以僭郊為請王使史角止之而不從魯由此而

僭郊則惠公之暴橫無君過於晉文楚莊矣決不
然也橫渠以為成王之意不敢臣周公故以二王
之後待魯而命以禮樂特伯禽不當受此說得之
明堂位成王以周公為有勲勞於天下命魯公世
世祀周公以天子之禮樂是以魯君孟春乘大路
載弧韜十有二旒日月之章祀帝於郊配以后稷
天子之禮也祭統昔者周公旦有勲勞於天下成
王康王追念周公勲勞而欲尊魯故賜以重祭外

祭則郊社是也內祭則大嘗禘是也夫所謂祀周公以天子之禮樂者如樂用宮懸舞用八佾以天子所以祭其祖者用之於周公之廟謂之尊周公可也至於郊祀后稷以配天禘者禘其祖之所自出而以其祖配之則非諸侯之所當僭且郊禘所祀元未嘗及周公則何名為報周公之勲勞而尊之乎以其祖宗之勲勞而許其子孫僭天子之禮樂以祭之已非矣况所祀者乃天子之太祖而本

非有勲勞之臣乎先儒議此但謂周公有知決不
歆非禮僭竊之祀而不知僭郊僭禘則其所祀本
不及周公不知成王何名而賜之伯禽又何名而
受之乎禮運孔子曰魯之郊禘非禮也周公其衰
矣杞之郊也禹也宋之郊也契也是天子之事守
也橫渠因此遂以為成王念周公之勲勞不敢臣
之故以二王之後待魯往往當時事情亦是如此
愚嘗因是而考論之禮制之陵夷非一朝夕之故

其所由來者漸矣蓋周之封杞宋也以其為二王
之後俾之修其禮物作賓於王家以奉禹契之祀
而禹契天子之祖也不可以諸侯之太祖祀之故
許其用天子之禮然特許其用天子之禮祀禹契
之廟未必許其郊天也夷王以下君弱臣強上陵
下僭杞宋因其用天子之禮樂於禹契之廟而禹
契則配天之祖也遂併僭行郊祀上帝之禮焉此
夫子所以有天子事守之嘆也至於魯則周公本

非配天之祖而稷鬯之祀元未嘗廢無藉於魯之
郊禘也乃因其可以用天子之禮樂於周公之廟
而併效杞宋之尤則不類甚矣其後三桓遂至八
佾舞於庭豈無所自而然哉 明堂位首言命魯
公世世祀周公以天子之禮樂又云季夏六月以
禘禮祀周公於太廟牲用白牡犧象云云即此二言
觀之可見當時止許用郊禘之禮樂以祀周公未
嘗許其遂行郊禘之祀後來乃至於禘鬯郊稷祀

天配祖一一用天子之制所謂穿窬不戢遂至斬
闕作俑不止遂至用人亦始謀之未善有以肇之

也

左傳宋公享晉侯於楚邱請以桑林

註桑林殷天子

之樂名

荀瑩辭荀偃士句曰諸侯魯宋於是觀禮魯

有禘樂賓祭用之宋以桑林享君不亦可乎乃知
魯宋不特僭天子之禮樂以祀郊禘雖燕享賓客
亦用之矣

秦始皇既并天下以昔文公出獵獲黑龍此其水德之

瑞用十月為歲首色尚黑音尚大呂

大呂音律之始

東游海上

禮祀八神

具雜祠篇

二代尊雍四時上帝春以脯酒為歲祠

禱因泮凍秋涸凍冬賽祠五月嘗駒及四中之月月祠

時駒四匹

每時用駒四匹而春秋異色

木寓龍一駒

寓寄也寄生龍形於木也駒亦

四龍木寓車馬一駒各如其帝色黃犢與羔各四珪幣各

有數皆生瘞無俎豆之具三年一郊常以十月上宿郊

見

秦以十月為歲首故上宿上齋戒也

通權火

張晏曰權火爇火也狀若井桔槔其法類稱欲令光

明遠照通於祀所漢祀五時於雍五十里一爇火師古曰凡祭祀通舉火者或以天子不親至祠所而望拜

或以衆祠各處欲其一時薦享
宜知早晏故以火為之節度也
拜於咸陽之旁而衣尚

白其用如常

時經焚書坑儒後更無典禮祠享用
木寓龍木寓馬不知何憑如此乖謬

初秦襄公攻戎救周始列為諸侯居西垂

漢隴西郡
西縣今在

秦州上封縣
西南九十里

自以為主少皞之神作西時祠白帝其

牲用騶駒黃牛牴羊各一云其後十六年秦文公東

獵汧渭之間卜居之而吉文公夢黃蛇自天下屬地

其口止於鄜衍

鄜屬馮翊
山阪曰衍

史敦曰此上帝之徵君其

祠之於是作鄜時用三牲郊祭白帝焉其未作鄜時

也而雍旁故有吳陽武時雍東有好時皆廢無祠或
曰自古以雍州積高神明之奧故立時郊上帝諸神
祠皆聚云蓋黃帝時常用事雖晚周亦郊焉其語不
經見搢紳者不道作廊時後七十八年秦德公既立
卜居雍後子孫飲馬於河遂都雍雍之諸祠自此興
用三百牢於廊時索隱曰百當為白秦君西祀少皞
牲尚白牢秦諸侯也雖奢侈僭祭
郊本特牲不可用三百
牢以祭天蓋字誤也德公立二年卒其後六年秦
宣公作密時於渭南祭青帝其後秦靈公作吳陽上

時祭黃帝

徐廣曰凡去作密時二百五十年

作下時祭炎帝

索隱曰吳陽地

名蓋在嶽之南又上云雍旁有故吳陽武時今蓋因武時又作上下時以祀黃帝炎帝

櫟陽雨

金秦獻公自以為得金瑞故作畦時櫟陽而祀白帝

晉灼曰漢註在隴西西縣人先祠山下形如種韭畦索隱曰漢舊儀云祭人先於隴西西縣人先山山

上皆有土人山下有時如種韭畦畦中各有二十封故云畦時其後百二十歲而秦

滅周

漢高祖二年東擊項籍而還入關問故秦時上帝祠何帝也對曰四帝有白青黃赤帝之祠高祖曰吾聞天有

五帝而今有四何也莫知其說於是高祖曰吾知之矣
乃待我而具五也乃立黑帝祠命曰北時有司進祠上
不親往詔曰吾甚重祠而敬祭今上帝之祭及山川諸
神當祠者各以其時禮祠之如故

文帝十三年制曰朕賴宗廟之靈社稷之福方內艾安
民人靡疾間者比年登朕之不德何以饗此皆上帝諸
神之賜也蓋聞古者饗其德必報其功其增諸神祠有
司議增雍五時路車各一乘駕被具駕車被馬之飾皆具西時畦

時寓車各一乘寓馬四匹駕被具

十四年詔曰朕獲執犧牲珪幣以事上帝宗廟十四年於茲歷日彌長以不敏不明而久撫臨天下朕甚自媿其廣增諸祀壇塲珪幣昔先王遠施不求其報望祀不祈其福右賢左戚先民後己至明之極也今吾聞祠官祝釐皆歸福於朕躬不為百姓朕甚媿之夫以朕之不德而專享獨美其福百姓不與焉是重吾不德也其令祠官致敬無有所祈

十五年黃龍見成紀詔曰有異物之神見於成紀毋害

於民歲以有年朕幾郊祀上帝諸神

幾讀曰冀

禮官議毋諱

以朕勞

無諱以朕為勞自言不以為勞也

有司皆曰古者天子夏親郊

祀上帝於郊故曰郊於是夏四月帝始幸雍郊見五時

祠衣皆尚赤又採新垣平之說立渭陽五帝廟

見五帝門

十六年夏四月上郊祀五帝於渭陽祠所用及儀亦如

雍五時

武帝元光二年行幸雍郊見五時後常三歲一郊

後亳人謬忌秦祠泰一方曰天神貴者泰一泰一佐

者五帝古者天子以春秋祭泰一東南郊日一太牢

七日

每日以一太牢凡七日祭也

為壇開八通之鬼道於是天子

令太祝立其祠長安城東南郊常奉祠如忌方其後
人上書言古者天子三年一用太牢祠三一天一地
一泰一天子許之令太祝領祠之於忌泰一壇上如
其方

五年郊雍獲一角獸若麋然

麋鹿屬也形似麋牛尾一角

有司曰陞

下肅祗郊祀上帝報享賜一角獸蓋麟云於是以薦五
時時加一牛以燎

或言五帝泰一之佐宜立泰一而上親郊之上疑未
定齊人公孫卿言黃帝采首山銅鑄鼎於荆山下鼎
既成有龍下迎帝上仙事於是天子曰嗟乎誠得如
黃帝吾視去妻子如脫屣耳拜卿為郎使東候神於
太室上遂郊雍至隴西登崆峒幸甘泉令祠官寬舒
等具泰一祠壇祠壇放亳忌太一壇三陔五帝壇環

居其下各如其方黃帝西南除八通鬼道泰一所用
如雍一時物而加醴棗脯之屬殺一犛牛以為俎豆
牢具而五帝獨有俎豆醴進其下四方地為服食羣
神從者及北斗云已祠胙餘皆燎之其牛色白白鹿
居其中彘在鹿中鹿中水而酒之祭日以牛祭月以
羊彘特泰一祝牢則衣紫及繡五帝各如其色日赤
月白十一月辛巳朔旦冬至昉爽昉音忽未明之時也天子始
郊拜泰一朝朝日夕夕月則揖而見泰一如雍郊禮

其贊饗曰天始以寶鼎神策授皇帝朔而又朔終而復始皇帝敬拜見焉而衣尚黃其祠列火滿壇壇旁烹炊具有司云祠上有光公卿言皇帝始郊見泰一雲陽有司奉瑄玉嘉牲薦享是夜有美光及晝黃氣上屬天太史令談祠官寬舒等曰神靈之休祐福兆祥宜因此地光域立泰畤壇以明應令太祝領秋及臘間祠三歲天子一郊見後嬖臣李延年以好音見帝善之下公卿議曰人間祠尚有鼓舞樂豈郊祠無

樂豈稱乎公卿曰古者祠天地皆有樂而神祇可得
而禮乃立樂府以延年為協律都尉論律呂合八音
之調作十九章之歌以正月上辛用事甘泉園丘使
童男女七十人俱歌昏祠至明夜嘗若有神光如流
星止集於祠壇天子自竹宮遙拜以竹為宮
去壇三里百官侍
祠者數百人皆肅然心動

郊祀歌十九章 練時日一 帝臨二 青陽三

朱明四 西颢五 元冥六 惟泰元七 天地八

日出入九

天馬十

元狩元年馬生
渥洼水中而作

天門十一

景星十二

元鼎五年得
鼎汾陰作

齊房十三

元封二年芝
生甘泉齋房

作

后皇十四

華煜煜十五

五神十六

朝隴

首十七

象載瑜十八

赤蛟十九

元封二年冬郊雍五帝還拜祝祠泰一

拜而祠之
加祝詞

贊饗

曰德星昭衍厥惟休祥壽星仍出淵耀光明信星昭見

皇帝敬拜泰祝之享

其年秋有星孛于東井後十餘日有星孛于三能

讀曰

台望氣王朔言候獨見鎮星出如瓜食頃復入有司

皆曰陛下建漢家封禪天其報德星云

德星即鎮星言天以德星

報於帝

太初二年有司言雍五時無牢孰具芬芳不備廼令祠

官進時犢牢具色食所勝

孟康曰若火勝金則祠赤帝以白牲也

而以木

寓馬代駒云及諸名山川用駒者悉以木寓馬代獨行過親祠乃用駒他禮如故

宣帝神爵元年詔曰蓋聞天子尊事天地修祀山川古

今通禮也間者上帝之祠闕而不親十有餘年

自大將軍霍光

輔政上恭己南面非宗廟之祭不出

朕甚懼焉朕親飭躬齋戒親奉祠為

百姓蒙嘉氣獲豐年焉

二年正月上始幸甘泉郊見泰時數有美祥修武帝故事盛車服敬齋祠之禮頗作詩歌

四年詔曰廼者鳳凰甘露降集京師嘉瑞並見修興泰一五帝后土之祠祈為百姓蒙祉福鸞鳳萬舉蜚覽翺翔集止於旁齋戒之暮神光顯著薦鬯之夕神光交錯

或降於天或登於地或從四方來集於壇上帝嘉嚮海
內承福其赦天下

五鳳元年上幸甘泉郊泰時

二年上幸雍祠五時

甘露元年上行幸甘泉郊泰時

三年上行幸甘泉郊泰時朝匈奴單于於甘泉宮

黃龍元年上行幸甘泉郊泰時

元帝即位遵舊儀間歲正月一幸甘泉郊泰時又東至

河東祠后土西至雍祠五時凡五奉泰時后土之祠亦施恩澤惠時所過毋出田租

成帝建始元年十二月作長安南北郊罷甘泉汾陰祠
帝初即位丞相匡衡御史大夫張譚奏言帝王之事
莫大乎承天之序承天之序莫重於郊祀故聖王盡
心極慮以建其制祭天於南郊就陽之義也瘞地於
北郊即陰之象也天之於天子也因其所都而各饗
焉往者孝武皇帝居甘泉宮即於雲陽立泰時祭於

宮南今行常幸長安郊見皇天反北之泰陰祠后土
反東之少陽事與古制殊又至雲陽行谿谷中阨陁
且百里汾陰則渡大川有風波舟楫之危皆非聖主
所宜數乘郡縣治道共張吏民困苦百官煩費勞所
保之民行危險之地難以奉神靈而祈福佑殆未合
於承天子民之意昔者周文武郊於豐鄠成王郊於
維維邑由此觀之天隨王者所居而饗之可見也甘泉
泰時河東后土之祠宜可徙置長安合於古帝王願

與羣臣議定奏可大司馬車騎將軍許嘉等八人以
為所從來久遠宜如故右將軍王商博士師丹議郎
翟方進等五十人以為禮記曰燔柴於泰壇祭天也
瘞瘞於泰折祭地也兆於南郊所以定天位也祭地
於泰折在北郊就陰位也郊處各在聖王所都之南
北書曰越三日丁巳用牲於郊牛二周公加牲告徙
新邑定郊禮於雒明王聖主事天明事地察天地明
察神明章矣天地以王者為主故聖王制祭天地之

禮必於國郊長安聖主之居皇天所觀視也甘泉河東之祠非神靈所享宜徙就正陽太陰之處違俗復古循聖制定天位如禮便

衡又言甘泉泰畤紫壇八觚宣通象八方五帝壇周環其下又有羣神之壇以尚書禮六宗望山川徧羣神之義紫壇有文章采鏤黼黻之飾及玉女樂石壇僊人祠瘞鸞路駢駒寓龍馬不能得其象於古臣聞郊柴饗帝之義掃地而祭尚質也歌大呂舞雲門以

竢天神歌大簇舞咸池以竢地祇其牲用犢其席藁

稽其器陶匏

稽音憂

皆因天地之性貴誠尚質不敢修

其文也以為神祇功德至大雖修精微而備庶物猶
不足以報功唯至誠為可故尚質不飾以章天德紫
壇偽飾女樂鸞路騂駒龍馬石壇之屬宜皆勿修

衡又言王者各以其禮制事天地非因異世所立而
繼之今郊雍廊密上下時本秦侯各以其意所立非
禮之所載術也漢興之初儀制未及定即且因秦故

祠復立北時今既稽古建定天地之大禮郊見上帝
青赤白黃黑五方之帝皆畢陳各有位饌祭祀備具
諸侯所妄造王者不當長遵及北時未定時所立不
宜復修天子皆從焉及陳寶祠由是皆罷

二年正月辛巳上始郊祀長安南郊詔曰廼者徙秦時
后土於南郊北郊朕親飭躬郊祀上帝皇天報應神光

並見三輔長無共張繇役之勞

漢每上雍祠甘泉有千乘萬騎今移祀於南郊

北郊故無供張繇役也

赦奉郊縣長安長陵

天郊在長安城南地郊在長安城北長陵

界中二縣有奉郊之勤故一切並赦之

及中都官耐罪徒減天下賦錢算

四十

永始三年冬十月皇太后詔有司復甘泉泰畤陰后

土雍五畤陳寶祠

作南北郊之明年匡衡坐事免官爵衆庶多言不當

變動祭祀者又初罷甘泉泰畤作南郊日大風壞甘

泉竹宮折拔時中樹木十圍以上百餘天子異之以

問劉向向言家人尚不欲絕種祠

種祠繼嗣所傳祠也

況於國

之神寶舊時且甘泉汾陰及雍五時始立皆有神祇
感應然後營之非苟而已也武宣之世奉此三神禮
敬勅備神光尤著祖宗所立神祇舊位誠未易動上
意恨之後上以無繼嗣故令皇太后詔有司曰蓋聞
王者承事天地交接泰一尊莫著於祭祀孝武皇帝
大聖通明始建上下之祀營泰時於甘泉定后土於
汾陰而神祇安之享國長久子孫蕃滋累世遵業福
流於今今皇帝寬仁孝順奉循聖緒靡有大愆而久

無繼嗣思其咎職殆在徙南北郊違先帝之制改神祇舊位失天地之心以妨繼嗣之福春秋六十未見皇孫食不甘味寢不安席朕甚悼焉春秋大復古善順祀其復甘泉泰畤汾陰后土如故及雍五畤陳寶祠在陳倉者天子復親郊禮如前

四年春上行幸甘泉郊泰畤

時成都侯王商為大司馬輔政杜鄴說商曰東隣殺牛不如西隣之禴祭言奉天之道貴以誠質大得民

心也行穢祀豐猶不蒙祐德修薦薄吉必大來古者
壇場有常處燎裡有常用贊見有常禮犧牲玉帛雖
備而財不匱車輿臣役雖動而用不勞是故每舉其
禮助者歡說大路所歷黎元不知今甘泉河東天地
郊祀咸失方位違陰陽之宜及雍五時皆曠遠奉尊
之役休而復起繕治供張無解已時皇天著象殆可
畧知前上甘泉先畷失道禮月之夕奉引復迷祠后
土還臨河當渡疾風起波船不可御又雍大雨壞平

陽宮垣廼三月甲子震電災臨光宮門祥瑞未著咎
徵仍臻迹三郡所奏皆有變故不答不饗何以甚此
詩曰率由舊章先王法度文王以之交神於祀子孫
千億宜如異時公卿之議復還長安南北郊

元延元年三月行幸雍祠五時

二年正月行幸甘泉郊泰時

時上郊祀甘泉泰時汾陰后土以求繼嗣召揚雄待

詔承明之殿

承明殿在未央門

正月從上甘泉還奏甘泉賦

以風甘泉本因秦離宮既奢泰而武帝復增通天高
光迎風宮外近則洪厓旁皇儲胥弩陸遠則石闕封
巒枝鵲露寒棠梨師得遊觀屈竒瑰偉非木摩而不
雕牆塗而不畫周宣所考盤庚所遷夏卑宮室唐虞
採椽三等之制也且其為已久矣非成帝所造欲諫
則非時欲默則不能已故遂推而隆之廼上比於帝
室紫宮若曰此非人力之所為儻鬼神可也又是時
趙昭儀方大幸每上甘泉常法從在屬車間豹尾中

故雄聊盛言車騎之衆參麗之駕非所以感動天地
逆釐三神又言屏玉女卻慮妃以微戒齋肅之事賦
成奏之天子異焉

三年幸雍祠五時

四年幸甘泉郊泰時

綏和元年行幸雍祠五時

二年春正月行幸甘泉郊泰時三月帝崩皇太后詔有
司曰皇帝即位思順天心遵經義定郊禮天下說憲懼

未有皇孫故復甘泉泰畤汾陰后土庶幾獲福皇帝恨難之卒未得其祐其復南北郊長安如故以順皇帝之意也

哀帝建平三年寢疾乃令太皇太后詔有司曰皇帝孝順奉承聖業靡有懈怠而久疾未瘳夙夜唯思殆繼體之君不宜改作其復甘泉泰畤汾陰后土祠如故上亦不能親至遣有司行事而禮祠焉後三年帝崩

平帝元始五年復南北郊罷甘泉汾陰祠

大司馬王莽奏言王者父事天故爵稱天子孔子曰
人之行莫大於孝孝莫大於嚴父嚴父莫大於配天
王者尊其考欲以配天緣考之意欲尊祖推而上之
遂及始祖是以周公郊祀后稷以配天宗祀文王於
明堂以配上帝禮記天子祭天地及山川歲徧春秋
穀梁傳以十二月下辛卜正月上辛郊高皇帝受命
因雍四時起北時而備五帝未共天地之祀孝文十
六年用新垣平初起渭陽五帝廟祭泰一地祇以太

祖高皇帝配日冬至祠泰一夏至祠地祇皆并祠五
帝而共一牲上親郊拜後平伏誅廼不復自親而使
有司行事孝武皇帝祠雍曰今上帝朕親郊而后土
無祠則禮不答也於是元鼎四年十一月甲子始立
后土祠於汾陰或曰五帝泰一之佐宜立泰一五年
十一月癸未始立泰一祠於甘泉三歲一郊與雍更
祠亦以高祖配不歲事天皆未應古制建始元年徙
甘泉泰畤河東后土於長安南北郊永始元年三月

以未有皇孫復甘泉河東祠綏和二年以卒不獲祐
復長安南北郊建平三年懼孝哀皇帝之疾未瘳復
甘泉汾陰祠竟復無福臣謹與太師孔光長樂少府
平晏大司農左咸中壘校尉劉歆太中大夫朱陽博
士薛順議郎國由等六十七人議皆曰宜如建始時
丞相衡等議復長安南北郊如故莽又頗改其祭禮
曰周官天墜之祀墜古地字也樂有別有合其合樂曰以
六律六鍾五聲八音六舞大合樂祀天神祭墜祗祀

四望祭山川享先妣先祖凡六樂奏六歌而天墜神祇之物皆至四望蓋謂日月星海也三光高而不可得親海廣大無限界故其樂同祀天則天文從祭墜則墜理從三光天文也山川地理也天地合祭先祖配天先妣配地其誼一也天地合精夫婦判合祭天南郊則以地配一體之誼也天地位皆南鄉同席地在東共牢而食高帝高后配於壇上西鄉后在北亦同席共牢牲用鴈栗

牛角如鴈及栗者牛之小也

元酒陶匏禮記

曰天子籍田千畝以事天地繇是言之宜有黍稷天地用牲一燔燎瘞瘞用牲一高帝高后用牲一天用牲左及黍稷燔燎南郊地用牲右及黍稷瘞於北郊其旦東鄉再拜朝日其夕西鄉再拜夕月然後孝弟之道備而神祇嘉享萬福降輯此天地合祀以祖妣配者也其別樂曰冬至至於地上之圜丘奏樂六變則天神皆降夏日至於澤中之方丘奏樂八變則地祇皆出天地有常位不得常合此其各特記者也陰

陽之別於日冬夏至其會也以孟春正月上辛若丁
天子親合祀天地於南郊以高帝高后配陰陽有離
合易曰分陰分陽迭用柔剛以日冬至使有司奉祠
南郊高帝配而望羣陽日夏至使有司奉祭北郊高
后配而望羣陰皆以助致微氣通道幽弱當此之時
后不省方故天子不親而遣有司所以正承天順地
復聖王之制顯太祖之功也渭陽祠勿復修羣望未
悉定定復奏奏可三十餘年間天地之祠五徙焉

漢舊儀元年祭天二年祭地三年祭五帝於五時三
歲一辯皇帝自行羣臣從齋皆百日他祠不出祭天
紫壇幄帷高皇帝配天居堂下西向紺席祭天用六
綵綺席六重長一丈一副四周緣之祭天用玉几玉
飾器凡器七千百物飾具祭天養牛五歲至三千斤
皇帝祭天居雲陽宮齋百日上甘泉通天臺高二十
丈以候天神之下見如流火舞女童三百人皆年八
歲天神下壇所舉烽火皇帝就竹宮去壇三里望對

壇竹宮中不至壇所甘泉臺去長安三百里望見長
安城皇帝以來所祭天之園丘也皇帝祭天地宗廟
駕四馬羽蓋華宴出則乘馬遠行在左纛黃屋乘六
馬纛左排馬頭上髦也

西京之事班史於祭祀儀文所述簡畧衛敬仲撰
漢舊儀頗有正史所未見者然其詞多率而敘述
亦無甚倫序如西漢未嘗舉高祖配天之祀惟武
帝作汶上明堂祠泰一五帝於明堂上坐合高皇

帝祠坐對之

服虔所註可見

而三歲郊見於雍時甘泉則

未嘗有配天之祖也今此謂高帝配天而又言居

堂下則未有配神作主而坐堂下者也其義難曉

姑錄以廣異聞

西漢郊祀之地凡三處

雍五時

其四時秦所建北時高祖所建領之祠官歲時致祭文帝十五年方親郊是後凡三

郊

渭陽五帝廟

文帝用新垣平之說建十六年上親郊繼而平誅遂領之祠官不親祭

甘泉泰一祠

武帝用方士謬忌公孫卿之說
建三歲一郊與雍五時更祠

王者祭天而以祖配之古今之通義祀典之首也
舜攝政之初類於上帝禋於六宗望於山川徧於
羣神湯代夏之初用元牡告於上帝神后武王代
殷之初告於皇天后土所過名山大川然則其所
祀者天與六宗地與山川而已初無祀五帝之文
周頌三十有一篇曰郊曰明堂曰柴望曰祈穀曰
報祭曰類禡所以告神明之事備矣亦無祀五帝

之樂章而祀五帝之說始於周禮先儒各以其意
為之訓詁以為五天帝者曰靈威仰赤熛怒白招
拒叶光紀含樞紐也以為五人帝者曰太皞炎帝
黃帝少皞顓頊也姑以五天帝言之則此五帝皆
天神之貴主五方之祀者意其在祀典當與日月
六宗並而亞於祀天者也秦襄公攻戎救周列為
諸侯而居西自以為主少皞之神作西時祠白帝
太史公讀秦記以為秦雜戎翟之俗作西時用事

上帝僭端見矣位在藩臣而臚於郊祀君子懼焉然以愚考之襄公以其有國於西也而祀少皞白

帝是猶宋人之祀閼伯晉人之祀實沈耳非郊天

也太史公誤矣

自漢人既以祭時為郊天太史公習見當時之事而追尤秦襄之僭

其實繼而諸時並興或由夢蛇而為廊時或因獲非也

石聞雉而為陳寶或由雨金而為畦時又繼而有

青帝黃帝炎帝之祠俱以時名之蓋少皞白帝西

方之神秦祠之宜也而并及青帝黃帝炎帝則非

所祭而祭者也至於鄜時陳寶之屬則皆秦中小神之為淫厲而驚動禍福者秦人無知亦為立時而同於諸帝之祠漢人不考復指四時以為郊天之事至高祖立黑帝祠以備五時而五帝俱祠矣然命有司進祠上不親往嗚呼安有郊見上帝而人主不親其事者乎往往見其所祠者叢雜冗泛是以姑諉之祠官修故事耳至孝文用新垣平之言而立渭陽五帝之廟孝武採謬忌之說而建太

一天皇之壇始親祠矣而皆謂之郊見夫郊事天之禮也諸方士言天神貴者泰一泰一佐者五帝則太一五帝俱天上之神爾以神為帝以祀神為郊而昊天上帝之祭固未嘗舉行也

泰及漢初以郊祀事天之

禮奉五帝至武帝時方士謬忌言泰一貴於五帝者也遂復以郊禮事泰一而五帝壇環居其下然終不聞舉祀天之禮至鄭康成遂創為六天之說以為泰一五帝并昊天而六也蓋異名而同體也然其說終難通蓋方士之說至為誕謾然猶言天神貴者泰一泰一佐者五帝終不敢言泰一五帝即天也康成儒者乃創六天之說何哉竊意泰一五帝之在天猶五嶽四瀆之在地也謂嶽瀆非地

固不可而以方澤祠后土之禮事嶽瀆亦不可謂已祭嶽瀆而遂廢后土方澤之祠尤不可蓋

秦襄所祠少皞白帝耳然秦俗信鬼好祠至其子孫遂并青黃赤帝而祠之至漢高帝立黑帝祠而以為事天之事畢矣蓋其祠本不經而諸時之怪妄尤甚高祖明達者也故雖有重祠敬祭之詔而卒不親享其亦有見於此矣漢初陋儒既不能有所建論是正賈生賢而知禮者也親承宣室鬼神之問亦不能引經援古定郊社明堂祀天配祖之

儀以革秦世之淫祠惜哉自是而後郊時祠禮之
豐殺每與方士之際遇相為盛衰渭陽五帝之親
祠也以新垣平平誅而帝怠於渭陽之祭泰一諸
祠之郊拜也以謬忌忌亡而祠官領三一之祠而
吳天上帝反不得比所謂泰一五帝者得享郊祀
之祭高祖創業之太祖亦終西都之世不得享配

天之祀豈不繆哉

按郊祀志天子封泰山欲治明堂奉高傍未曉其制濟南人公

玉帶上黃帝時明堂圖於是上令奉高作明堂汶上如帶圖及是歲修封則祀泰一五帝於明堂上

坐合高皇帝祠坐對之服虔註曰漢是時未以高祖配天故言對光武以來乃配之蓋漢時泰一五帝之祠不一其在甘泉者曰郊時三歲一親祠未嘗以祖配其在汶上者曰明堂武帝封泰山時所建方有高帝並祠每修封則祀之終帝之世五修封而昭宣之後無幸泰山修封之事則廢其祭矣然高皇帝之所並祠者泰一五帝不過天神之貴者則非配天也

至成帝時匡衡

請徙甘泉祠於長安定南北郊又言王者各以其禮制事天地非因異世所立而繼之今郊雍廊密上下時本秦侯各以其意所立非禮所載漢興之初儀制未定即且因秦故祠復立北時今既稽古

建定天地之大禮郊見上帝青赤白黃黑五方之
帝皆畢陳各有位饌祭祀備具諸侯所妄造王者
不當長遵及北時未定時所立不宜復修天子皆
從焉及陳寶祠因是皆罷并毀不應禮之祠四百
七十五所然後祀禮稍正然終不能建議盡復三
代以來郊祀明堂嚴父配天之禮而哀平之間怵
於禍福之說南北郊與甘泉五時互為罷復卒無
定制至王莽秉政請復長安南北郊祭天而以高

帝配善矣然復以高后配地祇而共祭則臆說不
經為甚蓋莽將篡漢故為是崇陰教以媚元后而
遂其盜權竊位之謀耳或曰匡衡之論正矣然史
載初罷甘泉泰畤作南郊日大風壞甘泉竹宮折
拔時中樹木十圍以上百餘天子異之以問劉向
而向以為不當革上卒無繼嗣哀平短祚漢以中
哀議者惑焉何也對曰千金之家其祖父奉淫昏
之鬼以求福而為之子孫者欲矯而正之則所舉

者未必蒙福而所廢者祇以掇禍如諸時之神雖
不正然漢代秦而興不能以禮革之方且信方士
之言愈加尊奉侔於事天其祭之也且歷七世百
五十餘年則其靈饗暴著也久矣固未易遽絕也

漢之中哀諸儒劉向谷永固嘗預言之向以人事永以天運然則固非廢淫祠之咎也逮世

祖中興建武郊天即採用元始故事而不復襲漢
初之跡甘泉諸時未嘗領之祠官加以尊奉而亦
不聞其能驚動禍福以來紛紛之議則以其絕之

有素也故曰君子以作事謀始

道家者流其所言者鍊養之事符籙之術耳然必
以天帝諸神為宗陳后山作白鶴觀記言漢兩劉
校中書為七略其叙方伎則有神仙諸子則有道
家而老莊並焉天地神祇三靈百神又皆出於禮
官而今之為道者合而有之益以符呪法籙捕使
鬼物皆老氏所不道晦庵亦言道家祀昊天上帝
為非且謂釋老之學盡當毀廢縱使不能盡去則

老氏之學但當自祀其老子關尹莊列之徒以及
安期生魏伯陽輩而他百祠自當領於天子之祠
官而不當使道家預之庶乎其可也然觀太史公
封禪書首叙帝舜類上帝禋六宗望山川祠五嶽
之事以至三代郊祀之禮然後及秦漢間不經之
祠且歷叙始皇孝武所得燕齊方士怪誕矯誣之
說共為一書班孟堅遂取以作漢郊祀志蓋秦漢
之君不能明理以古先聖王報本反始之大典視

為求仙徵福之一事故郊祀諸祠其說多出於方士作史者固不得而刪之也然少君藥大公孫卿粵人勇之徒其所言怪妄諸說本無關於祠祀者

如使物却老關墓及入海求不死藥大營宮室之類

亦叢雜附見於封禪郊

祀之書何耶如此則與道家之經典何異遷固儒者而著書指意如此固無怪黃冠師得以黃緣附會其說而啓后山晦庵之嘆也要之郊祀志只當叙說所祀天地百神本末而諸方士之言當別立

方伎傳述之乃為允當 道家以符籙役鬼之說
附會於天地百神則遷固封禪郊祀之書實啓之
以昊天上帝並列於所謂上九位天尊者則鄭康
成六天之說實啓之

世祖建武二年初制郊兆於雒陽城南七里依鄩采元
始中故事為圓壇八陛中又為重壇天地位其上皆南
鄉西上其外壇上為五帝位青帝位在甲寅之地赤帝
位在丙巳之地黃帝位在丁未之地白帝位在庚申之

地黑帝位在壬亥之地其外為壇重營時紫以像紫宮
有四通道以為門日月在中營內南道日在東月在西
北斗在北道之西皆別位不在羣神列中八陛陞五十
八醞合四百六十四醞五帝陞郭帝七十二醞合三百
六十醞中營四門門五十四神合二百一十六神外營
四門門百八神合四百三十二神皆背營內鄉中營四
門門封神四外營四門門封神四合三十二神凡千五
百一十四神營即壇也封封土築也背中營神五星也

及中宮宿五官神及五嶽之屬也背外營神二十八宿外宮星雷公先農風伯雨師四海四瀆名山大川之屬

也

醞竹蒿切
祭酌也

黃圖載元始儀上帝壇圓八觚徑五丈高九尺茅營去壇十步竹宮徑三百步土營徑五百步神靈壇各於其方面三丈去茅營二十步廣坐十五步合祀神靈以璧琮用辟神道以通廣各三十步竹宮內道廣三丈有闕各九十一步壇方三丈拜位壇亦如之

為周道郊營之外廣九步營六甘泉北辰於南門之外日月海東門之外河北門之外岱宗西門之外

為周道前望之外廣九步列望道乃近前望道外徑六十二步壇方二丈五尺高三尺五寸 為周道列

望之外徑九步卿望亞列望外徑四十步壇廣三丈高二尺 為周道卿望之外徑九步大夫望亞卿望道外徑二十步壇廣一丈五尺高一尺五寸 為周道大夫望之外徑九步士望亞大夫望道外徑十五

步壇廣一丈高一尺 為周道士望之外徑九步庶
望亞士望道外徑九步壇廣五尺高五寸 為周道
庶望之外徑九步凡天宗上帝宮壇營徑三里周九
里營三重通八方 后土壇方五丈六尺茅營去壇
十步外土營方二百步限之其五零壇去茅營如上
帝五神去營步數神道四通廣各十步宮內道廣各
二丈有闕 為周道后土宮外徑九步營岱宗西門
之外河北門之外海東門之外徑各六十步壇方二

大高二尺 為周道前望之外徑六步列望亞前望
道外三十六步壇廣一丈五尺高一尺五寸 為周
道列望之外徑六步卿望亞列望道外徑二十五步
壇廣一丈高一尺 為周道卿望之外徑六步大夫
望亞卿望道之外徑十九步壇廣八尺高八寸 為
周道大夫望之外徑九步士望亞大夫望道外徑十
二步壇廣六尺高六寸 為周道士望之外徑六步
凡地宗后土宮壇營方二里周八里營再重道四通

常以歲之孟春正月上辛若丁親郊祭天南郊以地
配望秩山川徧於羣神天地位皆南鄉同席地差在
東共牢而食太祖高皇帝高后配於壇上西鄉后在
北亦同席共牢而食日冬至使有司奉祭天神於南
郊高皇帝配而望羣陽夏至使有司奉祭地祇於北
郊高皇后配而望羣陰天地用牲二燔燎瘞瘞用牲
一先祖先妣用牲一天以牲左地以牲右皆用黍稷
及樂

七年大議郊祀制多以為周郊后稷漢當祀堯詔下公卿議侍御史杜林以為周室之興祚由后稷漢業特起功不緣堯祖宗故事所宜因循乃定從林議依舊制以高祖配

隴蜀平後乃增廣郊祀高帝配食位在中壇上西面

北上

漢舊儀曰祭天祭紫壇幄帷高皇帝配天居堂下西向紺帷帳紺席鉤命決曰自外至者無主

不止自內出者無匹不行天地高帝黃帝各用犢一頭青帝赤帝

共用犢一頭白帝黑帝共用犢一頭凡用犢六頭

漢舊

儀曰祭天養牛五歲至三千斤按禮記曰天地之牛角繭栗而此云五歲本志用犢是也日月北

斗共用牛一頭四營羣神共用牛四頭凡用牛五頭

凡樂奏青陽朱明西皓元冥及雲翹育命舞中營四

門門用席十八枚外營四門門用席三十六枚凡用

席二百一十六枚皆莞簟率一席三神日月北斗無

陛郭醑既送神饋俎實於壇南已地周禮凡以神仕者掌三辰之法

以猶鬼神祇之居辨其名物鄭玄曰猶圖也居謂坐也天者羣神之精日月星辰其著位也以此圖天神人鬼地祇之坐者謂布祭衆寡與其居向孝經說郊祀之禮曰燔燎掃地祭牲繭栗或象天酒旗坐星厨

倉具黍稷布席極敬心也言郊之布席象五帝坐禮祭宗廟序昭穆亦有似虛危則祭天圓丘象北極祭地方澤象后妃及社稷之席皆有明法焉

明帝永平二年以月令有五郊迎氣因採元始故事兆

五郊於雒陽

詳見祠五帝門

按自秦始皇有三歲一郊之制漢高惠二帝未嘗親郊文帝在位二十三年親郊雍時及渭陽五帝各一而已景帝不親郊武帝元光後常三歲一郊昭帝不親郊宣帝神爵以前十三年不親郊以後

間歲一郊元成如之蓋西都之所謂郊祀若雍五
時若甘泉泰一皆出於方士祈福之說而非有古
人報本之意惟武宣以求僊成帝以求嗣故三君
親郊頗多而其清心無求者則領之祠官修故事
而已世祖置郊丘於洛陽以高帝配祀始稍復古
人祀天之制但范史紀志不載親郊之歲月禮儀
志云正月上丁祠南郊禮畢次北郊明堂高廟世
祖廟謂之五供豈每歲行之邪祭祀志言二年初

制郊采元始中故事按元始之制常以歲孟春正月上辛若丁親郊祭天南郊以地配冬至則使有司祭天神於南郊以高帝配夏至使有司祭地祇於北郊以高后配然則天地之祭每歲親祠者一命有司祭者二豈歲以為常故不復紀述乎

昭烈章武元年即位設壇於成都武擔山南用元牡二年十月詔丞相諸葛亮營南郊於成都

文獻通考卷六十九